



**Qanoq iliornikkut uumassusileqatigiiaat nunanit allaneersut ajornartorsiutaanerata pinngitsoortissinnaanissaanut iliuuseqartoqarsinnaanersoq, nunatsinni uumasooersut innarlerneqannginnissaat pillugu apeqquteqaat aallaavigalugu oqallisissiasatut siunnersuut**  
(Inatsisartunut ilaasorta, Aqqalu C. Jerimiassen, Atassut)

Inatsisartunut ilaasortamut Aqqalu C. Jerimiassen-imut qujanaq oqallisissiap uuma saqqummiunneranut.

Aallaaniarneq piniarnerlu kulturitta ilitsoqqussattalu pingaernerit ilagaat. Taamaattumik Demokraatinut pingaartuuvoq, piniariaatsip taassuma piujuartuunissaata sulissutigijuarnissaa. Ilaatigut piumasaqaataavoq, piaqqiorfiit pitsaasut qulakkeernissaat aammalu nungusaataanngitsumik aallaaniarlutalu piniarnissarput, kinguaariinnut tulluuttunut piniagassaqaarniassammat.

Uagut inuit piniakkanut akisussaaffeqarpugut. Piaqqiorneranni illersortussaavagut isumagalugulu, piniarnerup naleqqussarnissaa ingerlasinnaaqullugu, piniagassat ataasiakkaat piujuarnissaat ineriartornissaallu ilutigalugit.

Soorlulu siunnersuuteqartup siunnersuuteqarnermini eqqaagaa, avataaniit sunnerneqarnerit piniagassatsinnut ulorianartorsiortitsisinnaapput. Uumassusileqatigiit siaruaraluttuinnarnerat, uani tassunga assersuutaavoq.

Siunnersuuteqartup pingaartumik canadap nerlera taakkartorpaa nunatta nerleranut unammillertitut. Siunnersuuteqartup ilaatigut eqqaavaa, piffissap aallaaniarsinnaanerup sivitsorneqarnera aaqqiissutaasinnaasutut. Tassungali ajornartorsiutaavoq, aallaaniarsinnaanermut piffissaq sivisoreeqimmat, canadap nerlerata nunarput qimariikatakkaa, aallaaniarsinnaaneq unittarmat.

Aammattaaq Aarhus Universitetimi ilisimatuut tikkuarpaat, nunatta nerlerisa ikiliartorneranut pissutaanersoq, 1995-imiilli ukiuni arlalinni piaqqiorneq iluatsippallaarsimangimmat, tamannalu Atlantikup avannaani immap kiannerulerneranik attuumassuteqartutut ilimagalugu. Uatsinnut tamanna iliuuseqarfiguminaassaaq.

Imaangilarli, tunniutiinnassasugut. Demokraatit siunnersuuteqartoq isumaqatigilluinnarpaat, nunatsinni piniagassagut illersussagigut. Periarfissaq unaasinnaavoq pilersaarusiortugut, qanoq ililluta qulakkeersinnaaneripput, nunatta nerlerata piaqqiornissaminut periarfissai pitsaanerulersillugit. Neriutugalugu amerliartulissasut. Aamma pingaartuuvoq, nunatta nerlerata canadallu nerlerata assigiinngissusaata ilisimaarilluernerulernissaa, kukkusumik nunatta nerlera canadap nerleranut eqqissisimatitamut taarsiullugu piniartorneqannginniassammat.

Oqariartuupput pingaarneq unaavoq, pingaartuuvoq, piniagassatta tamarmik illersorneqarnissaat. Qulakkiissagipput, pitsaasunik erniorfissaqarnissaat piniarnerullu nungusaataanngitsumik ingerlanneqarnissaa, meerartatta ernuttattalu iluaqutiginiassammatigit.



**DEMOKRAATIT**  
DEMOKRATERNE

Tassalu Demokraatit oqallinnermut isummersuutigigallagaat.